

# Martina Linn è la vusch dal nov Top Pop Rumantsch

■ (cp) Il nov Top Pop Rumantsch dad RTR porta il titel «Leder fin» e vegn interpretà da l'enconuscenta chantautura engiadinaisa Martina Linn. Glindesdi a las 11.00 en il Radio Rumantsch.

Suenter in lunga pausa da stad turna la retscha da Top Pop Rumantsch cun sia 43avla ediziun – in'ediziun straordinaria. La vusch tutga questa giada a Martina Linn, la giuvna chantautura enconuscenta da La Punt. Linn, ch'è creschida si en ina famiglia na-rumantscha – cun in bab sidtirolais ed ina mamma bernaisa – ha lantschà avant trais onns ina carriera nunditga, chantond agens songs per englais. Bain spert ha ella pudì fitgar pe en la scena naziunala, sa confermond l'onn 2015 cun ses segund album «Pocket Of Feelings». Ma Linn n'è betg estra al rumantsch, anzi, sin via ed en scola ha ella emprendi la lingua indigena, serrond giu la finala il gimnasi cun ina matura bilingua a Samedan. Ed en sia gruppa temporara Jodelterzett Engiadina, a la quala Martina fa part dapi si' uffanza, ha ella er gia chantà melodias popularas engiadinaisas.

Ma per scriver agens texts rumantschs na sa senta la chantautura, che stat actualmain per finir ses master a la Scuola da jazz Lucerna, betg anc segira avunda. E perquai ha ella surlaschà ils plets da ses Top Pop Rumantsch al collega ed ami trubadur *Curdin Nicolay* ch'ha concepì



**Martina Linn e sia gruppa han edì il nov Top Pop Rumantsch.**

MAD

per ella l'istorgia dal «Leder fin», in lader in pau caotic ed indecis. «Ina figura che sa cunfa bain cun mai», declera la chantautura, suttastritgond il grond plaschair

ch'ella ha da far questa premiera rumantscha. Ina chanzun cun in bel trantertun da folk modern, purtà da la gruppa actuala da Martina Linn cun *Bidu Rüegseg-*

*ger* al bass, *Alex Merz* a la batteria ed *Alessandra Murer*. D'udir a partir da glindesdi sin las undas-radio e sin la pagina dad RTR.